

Na osnovu člana 4. stav 1. Zakona o sudskoj policiji („Službene novine Federacije BiH“, broj 19/96 i 37/04), člana 4. Zakona o Sudskoj policiji Brčko distrikta BiH – prečišćeni tekst („Službeni glasnik Brčko distrikta BiH“, broj 18/18), a u vezi sa odredbama Zakona o pravnoj pomoći i službenoj saradnji u krivičnim stvarima između Federacije Bosne i Hercegovine, Republike Srpske i Brčko distrikta Bosne i Hercegovine („Službeni glasnik BiH“, broj 13/02 i 25/02),

- 1. Sudska policija Federacije Bosne i Hercegovine**, zastupana po Miloradu Novkoviću, predsjedniku Vrhovnog suda Federacije Bosne i Hercegovine i
- 2. Sudska policija Brčko distrikta BiH**, zastupana po Safetu Pizoviću, predsjedniku Pravosudne komisije Brčko distrikta BiH

(u daljem tekstu : potpisnici) su dana 22.11.2018. godine u Brčkom, zaključili

## **S P O R A Z U M**

### **O SARADNJI, PRUŽANJU POMOĆI I MEĐUSOBNOJ KOORDINACIJI, IZMEĐU SUDSKE POLICIJE FEDERACIJE BOSNE I HERCEGOVINE I SUDSKE POLICIJE BRČKO DISTRIKTA BIH**

#### **Član 1**

Sporazum o saradnji, pružanju pomoći i međusobnoj koordinaciji, između Sudske policije Federacije Bosne i Hercegovine i Sudske policije Brčko distrikta BiH (u daljem tekstu: Sporazum), utvrđuju se načini saradnje i pružanja pomoći između potpisnika Sporazuma, koji će se provoditi u granicama ovlaštenja proizašlih iz Zakona o Sudskoj policiji Federacije Bosne i Hercegovine („Službene novine Federacije BiH“, broj 19/96 i 37/04) i Zakona o Sudskoj policiji Brčko distrikta BiH – prečišćeni tekst („Službeni glasnik Brčko distrikta BiH“, broj 18/18), te drugih važećih propisa entiteta, Brčko distrikta BiH i Bosne i Hercegovine.

#### **Član 2**

Potpisnici Sporazuma se obavezuju da će po naredbi suda, izdatoj u skladu sa ovlaštenjima proisteklim iz Zakona o krivičnom postupku i drugim procesnim zakonima, a koja se odnosi na dovođenje, odnosno sprovođenje osumnjičenog, optuženog, svjedoka ili vještaka sa adrese stanovanja, postupiti mjesno nadležna organizaciona jedinica potpisnika Sporazuma. Sudska policija Brčko distrikta BiH zadržava obavezu postupanja po naredbama pravosudnih institucija Brčko distrikta BiH za dovođenje iz kazneno popravnih ustanova.

#### **Član 3**

- 1) Potpisnici Sporazuma se obavezuju da će prilikom izvršenja naredbe iz člana 2. Sporazuma, a kada postupajući službenici Sudske policije izvršavaju zadatak na području drugog mjesno nadležnog potpisnika Sporazuma, međusobno pružati pomoć i koordinirati aktivnosti, a u cilju što efikasnijeg izvršenja konkretnog zadatka.
- 2) Kada zbog većeg stepena složenosti i rizika, pomoć iz stava 1) ovog člana zahtjeva angažovanje većeg broja službenika sudske policije i većih materijalno tehničkih resursa ili aktivnost traje duži period, potpisnici Sporazuma se obavezuju da će blagovremeno obavijestiti mjesno nadležnu organizacionu jedinicu o provođenju aktivnosti na njenom području.
- 3) Potpisnici Sporazuma prilikom izvršenja naredbe iz stava 1. ovog člana, a koja se odnosi na izvršenje naredbe za dovođenje sa adrese stanovanja u nadležnu pravosudnu instituciju, koja se nalazi na području drugog mjesno nadležnog potpisnika Sporazuma u izuzetnim slučajevima, mogu lice prema kome se postupa predati mjesno nadležnoj organizacionoj jedinici potpisnika Sporazuma, radi predaje postupajućem nositelju pravosudne funkcije u vrijeme zakazano naredbom za dovođenje.



- 4) Predaja lica iz stava 3. ovog člana će se vršiti uz izdavanje potvrde o primopredaji lica, kojom prilikom će se mjesno nadležnoj organizacionoj jedinici potpisnika Sporazuma predati i primjerak naredbe za dovođenje.

#### Član 4

Potpisnici Sporazuma se obavezuju da će u skladu sa svojim nadležnostima i mogućnostima međusobno razmjenjivati informacije koje su od značaja za izvršenje poslova i zadataka iz nadležnosti potpisnika Sporazuma, posebno u dijelu sigurnosti i zaštite pravosudnih institucija i nositelja pravosudnih funkcija.

#### Član 5

Potpisnici Sporazuma se obavezuju da će u skladu sa svojim nadležnostima i mogućnostima međusobno koordinirati aktivnosti, pružati pomoć i podršku u svim slučajevima u kojima je koordinacija, pomoć i podrška potrebna, sa ciljem zakonitog i pravilnog izvršenja poslova i zadataka, odnosno realizacije naredbi pravosudnih institucija.

#### Član 6

Potpisnici Sporazuma su saglasni da samostalno ili u organizaciji sa drugim nadležnim tijelima entiteta ili Bosne i Hercegovine ili međunarodnim organizacijama, zajedno organizuju ili iniciraju organizovanje edukacija i obuka službenika Sudske policije, kao i da drugim zajedničkim aktivnostima i u koordinaciji sa nadležnim tijelima kontinuirano rade na promovisanju značaja postojanja i djelovanja institucija potpisnika Sporazuma.

#### Član 7

- 1) Za nadzor nad sprovođenjem Sporazuma, te izdavanje eventualnih instrukcija za sprovođenje odredbi istog svojim organizacionim jedinicama, zadužuju se glavni zapovjednik Sudske policije Federacije BiH i komandir Sudske policije Brčko distrikta BiH.
- 2) Rukovodioci iz prethodnog stava će u međusobnoj komunikaciji po potrebi analizirati funkcionalno i kvalitetno izvršenje odredbi Sporazuma i razmotriti druge aktivnosti koje su od zajedničkog interesa za djelovanje potpisnika Sporazuma.

#### Član 8

Sporazum stupa na snagu danom njegovog potpisivanja od strane ovlaštenih osoba potpisnika Sporazuma.

#### Član 9

Izmjene i dopune Sporazuma, vrše se na osnovu međusobnog dogovora, na način i po postupku provedenom pri njegovom zaključivanju.

#### Član 10

Sporazum je sačinjen u 4 (četiri) istovjetna primjerka, od kojih potpisnici zadržavaju po 2 (dva) primjerka.

**PREDSJEDNIK**  
Vrhovnog suda Federacije BiH

Milorad Novković

Broj : 5-29  
Dana: 22.11.2018. godine

**PREDSJEDNIK**  
Pravosudne komisije Brčko distrikta BiH

Safet Pizović

Broj : SuPK-1739/18  
Dana: 22.11.2018. godine